

皇居之鞏固周廬之巡徼不如環衛之森嚴皆在
聖明洞鑒之中無俟臣下再三之瀆也臣無任激切待
命之至謹繕摺密陳伏乞

皇上聖鑒謹

奏

咸豐八年四月二十六日

和議難成請速進剿摺

奏為逆夷狡譎柔服難施乞定

宸謨速伸

天討事竊惟自古帝王控制外夷德威並用有猾夏亂
常者則整飭六師驅而出之於境策之上也其次
不過戰與和二端先戰而後和則和可持久先和
而後戰則戰必無功若乃議戰議和回惑不定人
心漸渙兵氣益衰敵乃猝起以相乘我已因循而
自誤宋之宣和金之貞祐覆轍具在可為寒心安
危之幾不可不察今噉啖呷咪四夷糾結同謀聯